

# Ils pitgalains indigens

Sin ils fastizs dals schumbraders dal gaud

■ **Entaifer la sistemica dals utschels furman ils pitgalains (Picidae) in'atgna famiglia. Quella cumpiglia en tut il mund 28 geners cun dapli che 200 spezias. En Svizra vivan nov spezias; per lunschor la pli frequenta è il pitgalain grond, ulteriuras spezias vaira frequentas èn il pitgalain nair ed il pitgalain verd.** Cun excepziun dal volvachau fan tut las spezias indigenas part da la sut-famiglia Picinae (pitgalains per propi). Entaifer quella appartegna il pitgalain nair al gener Dryocopus ed il pitgalain traidet al gener Picoides; il pitgalain grisch ed il pitgalain verd tutgan tar il gener Picus e las quatter ulteriuras spezias – pitgalain strivlà, pitgalain grond, pitgalain mesaun e pitgalain pitschen – fan part dals pitgalains giagls (Dendrocopos).

## Tratgs caracteristics dals pitgalains

Cumbain che mintga pitgalain ha si'atgna cumparsa e moda da viver, datti tranter las spezias indigenas tschertas caracteristicas communablas che gidan a distinguer questa famiglia dad autras (sco per exempel dals utschels chantadurs). Tut ils pitgalains indigens sa tragnan l'entir onn en lur revier. Tranter mastgel e femella pon ins differenziar ad egl, damai che tut las spezias enconuschian in dimorfissem da schlattaina bain visibel. Durant il sgol sa distinguan ils pitgalains da bleras autras familias tras lur moviment undegiant.



In'ulteriura grupp da caracteristicas communablas pertutga la moda da sa mover sin ils bists da las plantas e da far foras en quels: Il pitgalain ha pes cun duas griflas enavant e duas enavos. Questa disposiziun da las griflas è pauc darsada en il mund dals utschels. Al pitgalain serva quai per sa tegnair ferm vi da la planta. Cur ch'el raiva sa posa el ultra da quai sin sia cua. Las plimas da quella èn uschè diras ch'ellas èn bunas da dar sustegn al pitgalain. Ma en quella moda s'isan ils piz fitg spert.

Il pichel marcant dovra il pitgalain – sco ch'il num di gia – per far foras en il lain e per piclar gronds insects e larvas or da las sfessas da las plantas. La lieunga dal pitgalain è extrem lunga ed ha piz sco arpunas che perforan la preda. Bliers pitgalains fan cuvels en las plantas per gnivar. Lur ovs èn alvs e traglischant. Els sumeglian



Il pitgalain grond è la spezia indigena per lunschor la pli frequenta.

FOTO: PD

glian quels da las tschuettas che cuan er ellas en cuvels.

## Las spezias indigenas las pli frequentas

### Pitgalain grond

Il pitgalain grond è il pitgalain il pli frequent en Svizra. Vi da quest uschè sa lascha la cumparsa ed il cumportament tipic dals pitgalains concretisar sco suonda: El viva sin plantas e rampigna cun grond inschign da bists e roma si. Las plimas da la cua dovra el sco sustegn. Els dus dets-pe che guardan enavant dovra el sco crutschs per sa tegnair vi da la planta. Els dus dets-pe davos sustegnan il moviment. Sias fermas griflas sa foran en la scorsa da la planta. El sigliotta en lingia da spirala dal bist si tschertgond larvas d'insects che vivan en la scorsa. Ses pichel giz fora tras las galarias dals insects. Uss pestga il pitgalain las larvas or da las foras cun la lieunga ch'è fitg lunga. Il piz da la lieunga è cornus ed ha pitschens cuntracrutschs. El è cuvert cun in schlem che tatga.

Surtut l'atun e l'envern maglia il pitgalain grond er sems che cuntegnan grass. El chatscha nitscholas e miscalcas da tieu e da pign tranter sfessas da la scorsa u en foras ch'el fa sez en la scorsa. Lura pitga el uschè ditg sin las nitscholas e miscalcas fin ch'el cuntanscha ils sems en lur intern. En talas fravgias da pitgalains chatt'ins savens gronds rests da maglia.

Durant la stagiun freida sa mussa il pitgalain grond mintgatant er en vischinanza da piazzas da pavlar.

Il pitgalain grond è bain udibel tras ses ferm «gic», «gic»; ed il zercladur strasuna il batlegim instancabel dals pitschens tras ils gauds. Cun ils members da la medema spezia communitgescha il pitgalain er cun pitgar sin il lain: cun batter sco in tambur in rataplan marchescha el ses revier.

Il mastgel porta in culier cotschen marcant, entant che la femella n'ha nagina color cotschna al chau. Durant il temp da cuar stgatscha il pitgalain grond mintga rival or da ses revier. Autras spezias èn pitgalain, sco per exempel il pitgalain mesaun che sumeglia el, cumporta il pitgalain grond percenter en ses revier.

Il pitgalain grond viva sin tut ils stgalims d'atezza fin al cunfin dal gaud. El gniva en plantas pli veglias. Il pichel dir dovra el sco in stgalper cura ch'el construescha sias taunas. Il pitgalain pitga uschè ferm sin il lain che las ziplas sgan. Sias taunas han la furma d'in satg. Ellas èn profundas fin 30 centimeters. Mintga pitgalain fa pliras taunas. El dovra quellas per durmir e per trair si ils pitschens.

### Pitgalain verd

Il pitgalain verd viva en cuntradas variadas cun gauds e pastgiras, pradas ed ers. Els piz verd brins da sias plimas al zuppentan bain tranter il fegliom da las plantas. En il gaud spess dovra il pitgalain verd alas curtas e radundas per ir ord via als impediments. Grazia a sias alas sa el er dosar il tempo, cur ch'el vul sa tschentar sin ina planta.

Cuntrari a bleras autras spezias d'utschels da la cuntrada mez averta e dals gauds clers, è s'augmentà il davos onns en Svizra il dumber da pitgalains verds. Quai n'è betg evident pertge che quest «pitgalain da la terra» è fitg spezialisà areguard ses Pavel: il pli gudent tschiffa el furmiclas dal prà. Quellas chatta el schizunt d'envern en lur gnieu sut la naiv. Per cuntanscher las furmiclas posseda el ina lieunga tatganta che mesira pli che 10 centimeters. Quella va en furma da lantscha da la missella sut vers la giargiatta e la taton e torna vers il frunt per finir en la chava da la missella sura.

### Pitgalain nair

Il pitgalain nair è grond sco in corv e furma la pli gronda spezia da pitgalain indigena. El abitescha cunzunt en plantas veglias da gauds maschadads ed è da chattar durant l'entir onn en ses revier da cuar. Cun ses ferm pichel da stgalper è el bun da chavar grondas foras en mutagls attatgads per tschertgar insects e lur larvas. Per bunas funtaunas da nutriment

cun bleras furmiclas e baus en la scorsa ed en il lain sgola el senz'autoer passa in kilometer.

Il pitgalain nair cua en foras stgalpradas sez. Perquai al chatt'ins cunzunt en gauds cun plantas grossas. Sias taunas da durmir e da cuar picla el en autezzas da 4–10 m en plantas ch'èn là anc passa 35 cm grossas; savens fa el talas en faus cun ina scorsa glischa. En il lain dir dal chau sto il pitgalain nair furar fin in mais per far sia fora. Els cuvels spazius ch'el n'utilisescha betg pli servan a blers animals, cunzunt a la tschuetta pailusa ed a la columba selvadia, sco lieu da refugiu.

## Ulteriuras spezias da pitgalains indigenas

### Pitgalain grisch

Il pitgalain grisch è stretgmain parentà cun il pitgalain verd. El sa distingua da quel tras ina color dal chau pli simpla e tras ses clom different. Ins al vesa per terra a la chatscha da furmiclas. Perquai che questa vivonda è daventada stgarsa en tschertas regiuns, è er il dumber da pitgalains grischs sa reduci considerablamain, surtut en la Svizra romanda e lung las Prealps.

Il pli tgunsch entaup'ins questa spezia en la planira en gauds da feglia ritgs da laina morta, damanaivel da lais e flums. Forsa sa tradescha el cun ses cloms marcants: ina seria da 5–20 tuns sonors da flauta che vegnan pli e pli bass ed a medem temp er pli plauns. Ina giada che l'utschè da color verd grischa è vegni scuvert, furma in eventual flatg cotschen sin il frunt in cler indizi ch'i sa tracta d'in mastgel; il medem vala dal reminent er per il flatg vi da la vista dal pitgalain verd.

### Pitgalain pitschen

La primavaira sa fa il pitgalain pitschen d'udir cun sequenzas da clers «chichichichichis» e schumbradas plitost flailvas, ma lungas. Uschiglio viva l'utschè stabel da grondezza d'in pasler ina vita discreta en gauds da riva, curtins da pumers cun bist aut ed en parcs en regiuns bassas. Impurtant per il pitgalain pitschen èn plantas da feglia cun scorsa groppa e blera laina morta.

### Pitgalain mesaun

Il pitgalain mesaun viva tar nus bunamain mo en gauds cun ruvers vegls cun scorsa groppa. Pervi da ses pichel relativamain curt e debel per in pitgalain picla el mo darar e na tambura insumma betg. Il Pavel per ses pitschens prenda el per gronda part giu da roma e feglia. L'envern fora el surtut en sfessas da scorsa per tschertgar insects e filiens.

### Pitgalain strivlà

Il pitgalain strivlà è il pli grond dals pitgalains giagls indigens ed a medem temp

quel ch'ins vesa il pli darar. Pir ils ultims onns han pudì vegnir observads en l'ost dal pajais (en la regiun da Buchs e Sargans) singuls pers che cuan. Damai che l'utschè tschenta ordvart autas pretenziuns a ses spazi da viver – gauds naturals cun blera laina morta – sa restrenscha sia derasaziun a territoris isolads ch'èn per l'uman be malmain accessibels. Il pitgalain strivlà maina ina vita zuppada e sa lascha il pli tgunsch observar durant il temp da curtegiament.

### Pitgalain traidet

Il pitgalain traidet è in uschè giagliard e tutina discret ch'è da chasa en ils gauds muntagnards, e quai surtut en ils gauds da pigns subalpins cun blera laina morta. El mussa ina clera preferenza per gauds da pigns betg memia spess e manca en lieus cun unicamain tieus, lareschs e schembers.

Il pitgalain traidet fa ritgs enturn la planta per tschiffar il suc da quella. Tals «ritgs da pitgalain» chatt'ins surtut sin schembers e pigns. Il mastgel sa differenziescha da la femella tras sia verscha melna. Tras questa chapitscha melna sa distingua il mastgel da tut tschels pitgalains indigens.

En il decurs da l'evoluziun ha questa spezia da pitgalain pers in det-pe – ils traits dets-pe restants dattan il num a questa spezia. Tar il det-pe che manca sa tracta da la griffa interna che guarda enavos tar auters utschels; persuerter guarda la quarta griffa pli externa enavos.

En Svizra furma il Grischnun ina da las regiuns principalas da la derasaziun dal pitgalain traidet ch'è plitost rar. El gniva en autezzas tranter 1500 e 1950 m e preferescha ils davos 200 m dal gaud serrà. Il pitgalain traidet n'è dentant betg exclusivamain in «utschè alpin»; quai mussa sia derasaziun da l'Europa Centrala fin lunsch en l'ost da l'Asia.

### Volvachau

Er il volvachau n'ha betg be in det-pe drizzà enavos, mabain dus – uschia tradescha l'utschè ch'el n'appartegna betg als utschels chantadurs, mabain a la famiglia dals pitgalains. Il volvachau è ina spezia da pitgalain che viva quasi exclusivamain da furmiclas e da lur poppas. Sch'el vegn disturbà, auza il volvachau las plimas da sia verscha sco ina cresta.

Ses spazi da viver preferi èn las cuntradas libras cun blier sulegl e singulas plantas veglias cun numerusas chavorgias. Volvachaus datti magari er en il curtins da pumera cun ina vegetaziun bassa nizzegiada a moda extensiva. Cun il svanir da las pradas naturalas e da la pumera svanescha er il volvachau da las cuntradas cultivadas a moda intensiva e va a viver en regiuns pli chaudas.



Fora da pitgalain.

FOTO: CIS / PIXELIO



Pitgalain verd – il flatg cotschen vi da la vista mussa ch'i sa tracta d'in mastgel. FOTO: PD

**La presentaziun:**  
Dossier «Pitgalains».

**Dapli infurmaziuns:**  
chatta.ch/?hiid=1816  
www.chattà.ch